

طلايب جاسمية وأبو جاسم

مشاهد من الأدب الساخر

مؤيد عبد الستار



مكتبة ملهم

رسوم الفنان جعفر طاعون
كاركتير الفنان أسامة عبد الكريم

طلايب

جاسمية وأبو جاسم

مشاهد من الأدب الساخر

بقلم

مؤيد عبد الستار

فهرس

- 1 - جاسمية تحاور أبو جاسم عن الانتخابات
- 2 - جاسمية تطلب شربة ماي من أبو جاسم
- 3 - جاسمية تحرك كلب أبو جاسم.. تخسر ما تخسر بالجير
- 4 - أبو جاسم يقرصن صندوق عرس جاسمية (يسبقه تخطيط رقم 3)
- 5 - جاسمية تصجم أبو جاسم: استهلس الواوي على اكل الدجاج
- 6 - جاسمية تتوعد أبو جاسم: ماطول كهوة وتتن كل الامور تهون
- 7 - جاسمية تحرك كلب أبو جاسم
- 8 - جاسمية تغمز أبو جاسم: اليدري يدري والمايدري كضبة عدس
- 9 - جاسمية تحتفل بالعيد على عناد أبو جاسم
- 10 - جاسمية تشارك في المظاهرات ضد ربع أبو جاسم
- 11 - جاسمية تهدد ربع أبو جاسم
- 12 - جاسمية تغضب على ربع أبو جاسم
- 13 - جاسمية تفضح ربع أبو جاسم
- 14 - جاسمية تشارك في مظاهرات البصرة بدون أبو جاسم
- 15 - جاسمية وحكومة أبو جاسم
- 16 - جاسمية ترشح للوزارة على عناد أبو جاسم
- 17 - جاسمية تودع الرئاسة بحضور أبو جاسم
- 18 - جاسمية تصرخ أين حقي يا أبو جاسم
- 19 - جاسمية: اكلها طريمش يا أبو جاسم
- 20 - جاسمية: تفرهد البنك يا أبو جاسم
- 21 - جاسمية تلبس سترة صفراء دون علم أبو جاسم
- 22 - جاسمية زعلانه على ترامب وأبو جاسم
- 23 - جاسمية تغني أجلبنك ياليلي.. يا أبو جاسم
- 24 - جاسمية ومزة عدس أبو جاسم
- 25 - جاسمية وغراميات أبو جاسم
- 26 - جاسمية وطلابة عشيرة أبو جاسم
- 27 - جاسمية ومجرشة أبو جاسم

مشهد رقم (1)

جاسمية تحاور أبو جاسم عن الانتخابات

- *ها.. أبو جاسم.. شكّتك.. مو كَتلك لا تنتخب ماكو فايده!
- جاسمية جوزي مني.. أني بياحال وانت لازمة سألقة الانتخابات الماصخة.
*هسه صارت ماصخة.. أني مو كَتلك ما نروح للولاية وما ننتخب، زين ها الخسارة الطاحت براسنه.
- دسكتي.. عبالج خسرانه المهناوية.. هي شجم دينار خسرناهن على الكباب اللي تغدينه بي أنا وياج.
* بس الكباب، جا.. التتن والكهوة اللي شربت بيها ثلاث جايات، والحلاوة اللي أكلتها ... انت شخليت ما سويته!
وجماله صاحبك النايب المحفوظ ما ربح وما راح تحصل المقسوم.
- ولج هسه هو شنو المقسوم، قصر باشا اعيان، شو النايب وعدنه خلك بشت وزوج نعل تسكّام، والله ما قسمهن إلنا.
* هي هم عايزه الله يقسم حرام، فوكاها بشت وزوج نعل.. هي يا الله.. ده كُول زيارة، حجة، دوا.. خو مو زوج نعل!
- هسه انت عفتي البشت وجلبتي بالنعل ... هي بت الحلال.. ده خليني بدردي.. مو راسي صار طبل من وره لسانج.
* اي.. لساني صار يسوي راسك طبل.. جا شلون تكول جاسمية أم لسان العسل لمن جنت اگلّك يا بعد روعي.. ها.. لساني صار كخ ... اقول صدك شراح يصير بالحكومة إذا ما اعترفت امريكا بالانتخابات.
- ده شوف المكرودة.. ولج امريكا شعليها بالانتخابات، هي العركة بين جماعتنا على الكعكة، امريكا شجابها بالطاري.
* اذا امريكا ما عليها، لعد منو.. قابل أبويه؟ لو النايب مالك اللي ماحصل الكعكة، وخالنا تي تي مثل ما رحتي جيتي.
- يابه ده جوزي من النايب، قابل بس هو اللي خسر.. اشو حتى صاحبتيج المكبعة خسرت والله ما استجاب الها ولا لدعائها، ولا للندر مالها.. مو كالت بالديوان أني ناذره لوجه الله عشر طليان اذبحهن بديوان أبو جويسم. شو ما تحجين.. نسيتي.. لو بس صاحبي النايب طلع فالصو.
* إي.. الله ما يضرب بحجار.. فوك البوك.. لا بلطوا شارع.. لا سورا مستشفى.. الله ينتقم منهم.
- ليش الله ينتقم منهم. خلي سبحانه وتعالى بعيد عن هالحرامية، احنا لازم ننتقم منهم وما ننتخبهم.
* جا ليش من اگلّك ما ننتخب تكول لا ننتخب، اشو كل ساعة انت براي والله حيرتني.
- الله لا يحير عبده، شوفي جاسمية أني قصدي لازم ننتخب الاجاويد وما ننتخب الحرامية حتى نرتاح بالسنيين الجاية.

* أبو جاسم.. يبين هم تريد تروح للولاية وتاكل كباب.
- والله بعد ما كو فلوس، كطنة وشيليتها من اذانج بعد نروح للولاية وننتخب الحرامية.

مشهد رقم (2)

جاسمية تطلب شربة ماي من أبو جاسم

لم يعرف أبو جاسم ان جاسمية تستمع للاخبار خلسة. كان يعتقد انها مشغولة بالطبخ والكنس ورعاية دجاجاتها التي تسرح وتمرح في البيت وعلى سطح المنزل كيفما تشاء. ولكن المفاجأة كانت بانها ضحكت عاليا حين طلب منها أن تسقيه استكان شاي زنگين من عمل إيدها المباركة.

- خير جاسمية.. شنو القصة.. اشو تضحكين.

* والله أبو جاسم طلايبك هواي.. اليوم ضحكنتي لانك تريد شاي زنگين

- يابه .. بطلنه.. ما نريد شاي زنگين.. سوينه شاي علموده

* أي بياخ.. شاي علموده.. خاف ما تقبل ... شوف لك غير سالفه

- ولج هاي بت ال... حلال.. ما تگلليلي شنو القصة.. اشو هو استكان شاي.. قابل رايد منج طوب أبو خزامة

* والله لو رايد طوب أبو خزامة اشوه.. على الاقل أروح أسحله سحل من المتحف واجيبه
گود بند

- صدك.. جذب.. استكان الشاي اللي أريده.. أصعب من طوب أبو خزامة

* اي .. مو بس أصعب.. لكن وداعتك أبو جاسم انت ما تگدر تسويه حتى لو أنطيك ميت...
طغار حنطة!!

- أكلاج.. انت صاير بعقلك شي، لو جاي تتغشمرين عليه؟ تره أني لحمي مالح.. ما ينضحج على عقلي.. ديرني بالج.

* هاي أيام زمان.. كبل جان يفيدك هالحجي.. اذا تريد استكان شاي زنگين، اشو ده روح جيب لي طاسة ماي .

- جاسمية.. ديرني بالج من تحجين.. تره انزلج العگال ... شنو روح جيب طاسة ماي، ما عندج رداد

* أبو جاسم.. انت ليش ايدك والعگال.. أنا اريد منك ماي حتى أسوي لك شاي زنگين.. شنو صعبه عليك، انت مو تقول وتردد قصيدة المرحوم عزيز السماوي:

أكدر أسوي الجسر دنبوس ...

اشو راويني علومك وجيب طاسة ماي حتى أسويك شاي زنگين.

- ليش شنو صاير، قابل الماي صار حليب عصفور، حتى ما اگدر أجيبه.

* والله مو حليب عصفور، صار حليب صگر.. ده روح شوف الشط، صار عبالك شطيپ
خلف السدة أيام زمان، كبل ما يسويه كرىم نهر قناة الجيش، ايام جان مايبه غير الصخام
واللطام.

- يعني ما وراج استكان شاي اليوم، سويتبها ظلمه ودليلها الله.

* لا، والله مو أني أبو جاسم، هاي الحكومة اللي ما دارت بالها على النهر، وخنلته بيد اليسوه
والمایسوه حتى نشف و صار شطيپ وما لنا غير ناخذ مساحينا ونحفر نهر جديد.

- هاي ما افتهمتها جاسمية.. شنو نحفر نهر جديد.. قابل إذا حفرنا يطلع الماي مثل بير
زمزم؟
* أبو جاسم.. هاي حسجة.. شجاك.. ما عرفتها ... يعني ... حكومة مثل حكومة كريم.

مشهد رقم (3)

جاسمية تحرك كلب أبو جاسم.. تخسر ما تخسر بالجير

- يبين اليوم جاسمية ما عاجب الوضع!
- * يا وضع ... شو الدنيا مكلوبة!
- هم كلبتيها.. شنو.. شصاير.. قابل مراكبج غركانة!
- * مراكبي.. ها.. ليش مو صوتك الانتخابي! شو مغلّس؟
- كافي بسامير جاسمية.. عليمن مغلّس.. هي شجم صندوق وشجم جهاز احتركن.
- * لا بالله.. شجم صندوق.. أي.. هنيالها لأمك.. مخازن المفوضية كلها احتركت.
- لا.. خبرني (مجلوب السلف) غال شجم صندوق وأجهزة احتركن و مو مشكلة.
- * هم اجينه على مجلوب السلف صويحك.. مو خسر بالانتخابات بعد شنو لازك بالمفوضية.
- شمالج... يا جاسمية.. مجلوب يگول راح يصير الحساب من جديد وعلى الاكثر إله نصيب.
- * يعني نعالك التسكام راح يصير مال وتستلمه راس الشهر.
- الله وأكبر عليج.. ما تجوزين من النعال التسكام.. عمي بطلت ما أريد لا نعال ولا بشت.
- * إذا ما تريد النعال.. جا ليش جايب لي بشارة مجلوب وتگول راح يصير له نصيب بالحسابات الجديدة.
- هسه إنت اصبري عليه إنطيني فنتك.. تشوفين شلون راح أصير حماية لمجلوب من يصير نايب.
- * ها.. هسة بينت النية الكشره.. مو بلاش.. رايح ويه مجلوب وجاي ويه مجلوب.
- يعني.. إنت ما تفرحين من يصير النا ضلع بالحكومة.. اشتريلج عبايه وجرغد بريسم.. واخليج تمشين عالمودة.
- * ليش يابه إشفنتني.. أني أبيع صوتي علمود جرغد بريسم.. والله لو ميت جرغد.. وحتى لو يصير الحساب من جده وجديد للانتخابات صويحك ما يطلع له سهم.
- فال الله ولا فالج.. انت ليش عريضي بكل شي.. مجلوب هم صديجنا وهم من عشيرتنا.
- * ما يفيدك هذا الحجبي.. ماطوله ما يمشي عدل.. ويفرهد مال الله وعباده.. ما ينجح لا بالانتخابات ولا بالدنيا ولا بالآخرة.
- جاسمية.. بالدنيا افتهمنا.. لاجن بالآخرة شلون تحكمين على الرجال.. قابل إنت جايبه خبر من رب العالمين.
- * لا.. لا خبر لا جفيه لا حامض حلو لا شربت.. صويحك ما يربح لو تطلع نخله براسه.
- لا.. هزيمة يخسر، وإذا خسر إحنا هم راح نخسر وياه.
- * أبو جاسم.. لا تگول إحنا.. گول أنا أخسر نعال التسكام.
- هاي شلون طلابه.. ابتليت على عمري وخليتج تعرفين سري. آخ مني.. ما اجوز.. أعمه كلب.
- * أكلك أبو جاسم سالفه صويحك والخسارة مثل سالفه عبود الكرخي ومحمد الكنجي.

- هاي السالفة شنو النوب.. أشو كمتي تشمرين بعيد.. شجابج على عبود الكرخي ... صاير حجيج تركزل.

* أي مو عبود الكرخي اتشارك ويه محمد الكنجي بتجارة الشعير، اشترىوا شعير وباعوه بخسارة.

- هاي شجابها على سالفة مجلوب والانتخابات.


* اي الها رباط لان عبود الكرخي كتب شعر وغناه الكبنجي، يگول:

من كايك تشري شعير / تخسر ما تخسر بالجير

شعيرك يخسر يا مصخم / قيمة نصه ما تلزم

انصحتك اترك لا تتدم / لو مطرب لو تاجر صير

تخسر ما تخسر بالجير



مشهد رقم (4)

أبو جاسم يقرصن صندوق عرس جاسمية

- خير جاسمية ... السلام لله!
- * أنتَ خليت سلام.. والله لو ما باجر عيد جان هسه اكلبها كلاب.
- جاسمية.. شنو القصة.. شو إنتِ إيدج والكلاب.. ما عندج غير سالفه.
- * لا ما عندي.. انت ليش صاير مثل القراصنة.
- هاي شنو النوب.. أول مرة أسمع قراصنة ... جاسمية يومية جايبنتلي قوارة جديدة.
- * إي.. سوّي روحك ماتعرف كلشي.. مگرود.. ولا جنك هذاك إنتِ.
- هسه إنتِ بدال ما تصبيلي استكان جاي.. تتلگيني بجنبش.
- * لا جنبش ولا جالغي.. وين رحت بالصندوق؟
- ياصندوق.. مال الانتخابات!
- * إي.. غشيم الله يحفظك.
- إنتِ ليش حجيج كله دفن.. كويلي يا صندوق حتى أفتهم. مو شلعتي جبدي.
- * اويلي عليك.. ياصندوق !! أبو جويسم آني عاجنتك وخابزتك.
- ما طول هيجي.. اكلج الصدك.. إنتِ مو بس خابزنتي.. لا وماكلنتي هم فوگاها.
- * ما كلتك.. ليش هو انت تنضاك.. شو جنك منشار تاكل وما تنوكل.
- هسه صرت منشار.. إي.. الله یرحمك سيد عليوي.. لمن جنتي ترحين يمه تسوين دعه حتى أملج.
- * لا دعه.. ولا حرز.. ذيج سوالف الجهل.
- وهسه شنو يابه.. صرتي دختوره لو نايبه بالمجلس.
- * إي.. الزمان يعلم.. ما كتلي وين أخذت صندوق العرس.
- اهوووو.. صندوق العرس.. هو شكو بيه حتى آخذه.. ما سامعه مظفر النواب يگول:
- مثل صندوق العرس,, ينباع خردة عشك من تمضي السنين
- * اي حقك.. صار خردة.. بس كلي وين أخذته.
- موجود جوه الدوشك فوك المرفع.
- * ليش ضامه هناك.. خاف فرهدته، أروح أشوفه
- لا تشوفيه ولا تدوخين.. جان بيه شجم فلس أخذتهن قرضة حسنة.
- * قرضة حسنة.. گول لفطتهن.
- لا. والله، صويحبي (مجلوب السلف) عاز فلوس للدعاية الانتخابية وطلب أساعده حتى يمشي أموره.
- * شوف أبو جويسم.. تروح هسه تجيب الفلوس وتجي لو ما لك كعده بها البيت.
- جاسمية اصبري عليه شجم يوم، خلي مجلوب يصير نايب وانا أجيلج ميت صندوق.
- * أنا فلوس حرام ما أريد.. گوم جيب الفلوس لا بهذا الفاس أشوف شغلي. گال (مجلوب السلف) يصير نايب! بعده ما صار، ناويهه على الفرهود.. لا... قيّم الرکاع من ديرة عفج.

مشهد رقم (5)

جاسمية تصجم أبو جاسم: استهلس الواوي على أكل الدجاج

- * أي.. هم هاي دنيا وتنكضي وحساب أكو تاليها..
- يبين اليوم جاسمية صايره فيلفوسة آخر زمان
- * شلون ما صير فيلفوسة والدنيا مكلوبه
- خير.. هم شكو.. شنو الصار.. هم انكلبت الدنيا
- * شلون ما تنكلب الدنيا وصويحك بيين هم راح يصير بالحكومة
- ما تفكينه من الحكومة.. هو أكو دولة.. حتى تصير عدنه حكومة؟
- * لا.. لا.. ما طول بالسلة عنب.. اكو حكومة
- هاي النوب شنو سالفة السلة والعنب.. ليش هو اكو عدنه ماي حتى يصير عدنه عنب؟
- * يعني الا ماي.. انتة شمالك ما تشوف أبعد من خشمك.
- أنا أخرج.. أنه ما اشوف أبعد من خشمي.. ولج والله أشوف الطير الطائر بالسما السابعة
- * أبو جويسم.. أنا مو كصدي عيونك تشوف.. أنا أريد عقلك يشوف.
- والله جاسمية انت حيرتيني.. أريد اوصل وياج على راي ما مش لا بالسما ولا بالكاع
- * هسه ما علينا.. العنب يعني النفط.. خليني اقولها لك بسراحة
- شجاب العنب على النفط.. شو صرتي تحجين شيش بيش
- * أبو جويسم.. يعني ما طول أكو عدنه نفظ.. تصير عدنه حكومة
- ليش هو النفط جديد.. شو من قالوا بلا عدنه نفظ.. يعني شنو الجديد يرحم والديج
- * الجديد.. الجماعة حادين سنونهم على النفط.. ويردون يلفطوه لفظ.
- هو شبقه ما لفظوه.. دخلهم يلفطوه والله كريم.. احنا النا الله.
- * شنو النا الله.. يعني قابل الله يدندل النا بالزنبيل.. لازم نشوف النا جاره.
- بس لا تكليبي جيب الفاس وتعال نطلع نسوي ثوره
- * لا.. لا تخاف.. مو مال فاس..
- لعد ما ليش بروح أبوج.. خو مو مال فشك وطك تفك.
- * اهوه... أبو جويسم.. ينرادلك خلك
- اي دفهمني هي بت الحلال.. إذا لا مال فوس ولا مال تفك.. لعد ماليش
- ما تكليلي. مو راسي صار طبل من وره سوافج العويصه والمعروجه
- * أبو جويسم.. هاي مال صفنه.. يراد الها صفنه طويلة
- جا إذا صفنه بسيطه.. اخذي صفنات.. أسهل من الصفنه ما مش
- * انشا الله تريد تصفن وتكعد كبالي
- جا شلون وين أكعد.. بالغار مثل النبي، انت مو تردين صفنه.. هاي أنا راح أصفن
- * خويه أبو جويسم.. الصفنه يعني ينرادله تشد حيلك وتشوف دربك
- أني أدري تاليها اشك زيحي واطلع من هدومي، شاشد من حيلي، هو بگه عندي حيل أشده،
- أنه أريد أكضي يومي واكل لكمة خبز وأبوج الله يرحمه.. لا أشد حيلي ولا هم يحزنون.

- * أبو جويسم هاي جديدة مال ولا هم يحزنون.. هاي منين لاكطها.. بس لا من صويحك
مجلوب السلف
- ما تجوزين من مجلوب السلف.. حتى الصناديك هم احترگن من وره سوافج
* يعني لو ما محروكات الصناديك جان صويحك يحصل على سلة العنب
- بويه هسه ما نريد العنب.. نريد السله
* گله لصاحبك مجلوب السلف يمش بوزه.. ما مش لا صناديك ولا أصوات..
- ليش هو اش ناگسه.. باجر يحسبوهن ويطلع أول واحد بالمجلس.. ما طول عمامه شادين
إله راس بالعشاير والمضايف.
- * شوف أبو جويسم.. إذا صويحك طلع له مكان بالمجلس أنه أگص إيدي.. ما يحصل كل
شي ماطوله ياكل مال الوادم.. ما يصير براسه خير
- ما تگایلي شماكل..؟ قابل ناهب الخزينة مال الخفوج!
* والله الناس كلها تعرفه، بيوك الكحل من العين
- لا.. هسه شويه فليسات مال مقاولات خسر بيهن
* والنوب يريد يا خذ مقاولات من جديد من يصير بالمجلس
خوش: يعني استهلس الواوي على أكل الدجاج.

مشهد رقم (6)

جاسمية تتوعد أبو جاسم: ما طول كهوة وتتن

- * إي.. مسعدة وبيتج على الشط ...
- ها أبو جويسم هو أي المسعدة لو ربعك اللي يعبون بالسكلة ركي
- * ما تكليلي ليش يعبون ركي.. قابل عدهم سكلة مال باب السيف
- إي غشّم روحك.. سكلة باب السيف.. لا سكلة باب الهوى
- * هسة ما علينا.. شنو سالفة الركي
- الركي مال ربعك.. الفرهدوه ويه صناديك الانتخابات
- * انت ما تجوزين من صناديك الانتخابات.. مو حركتيهن حرك.. ما عندج غير سالفة
- والله ما جوز منكم الا آخذ حقي
- * ومنو الماخذ حقج يابه.. إنشا الله إحنه
- إي إنت ومجلوب السلف.. شلون تاخذ البطاقة مالتي وتزورها
- * أنه لا مزورها ولا شي.. انت اللي ضيعتها
- لا.. ما ضيعتها.. أنه ضامتها بصندوق العرس اللي فرهدته
- * عفيه صندوق العرس.. شنو مغارة علي بابا.. كلشي بيه
- ما لي شغل.. أنه سجلت شكاية عند مكتب المفوضية.. أريد حقي
- * المفوضية تريد إثباتات.. مو كوتره.. مو علوة ركي، حمل وشيل والله وياك عبوسي
- عندي إثباتات.. عبالك أنه غشيمه!
- * شنو يابه إثباتاتج.. عندج شهود؟
- السالفة ما ينرادلها شهود.. منو بايع بطاقتي الانتخابية يطلعون إسمه ويقدموه للمحكمة
- * يا معوده.. هاي سالفة وجعانه.. يا محكمة.. يا شهود.. كلشي ما يسوون
- أنا ما جوز.. لازم أطلع حكي من حلوك الحرامية
- * هسة هو صوتج قابل راح يغير الحكومة.. يصعد ينزل هو صوت بيس نفر لا يزيد ولا ينكص
- انت عندك لا يزيد ولا ينكص.. أنا صوتي ما أتساهل بيه.
- * خوش ده خلي يربح صويحبنا مجلوب السلف وأنا أرد لج القاط قاطين.. أجيلج عباية بريسم
- خليها على حالك.. عبايه بريسم! لازم الصندوق اللي بي بطاقتي المزورة يبطل من الحساب ويردون يحسبوه من جده وجديد
- * يابه انت صدك تحجين.. جذب.. ماتدرين الصناديك احتركت وصارت تتن.
- الصناديك احتركت.. لكن الاوراق والدفاتر ما محروكة.. عدهم بالمفوضية
- * اش مدريج.. قابل انت بالمفوضية لو بالشرطة...همه كألوا احتركت وكلشي انتهى
- شوف أبو جويسم، ما طول أنه موجودة اطلع البوكة.. ومثل ما يكولون:
- ماطول كهوة وتتن / كل الامور تهون.

مشهد رقم (7)

جاسمية تحرك كلب أبو جاسم

- * هاي منين طالعه الشمس اليوم.. شنو القصة جاسمية مو من عوايدج
- ليش اش شفتني.. ما يلوگلي الفرحة!
* لا.. والله.. بس من زمان ما شايفج مهندسة مثل اليوم
- إي.. عندي مناسبة
* ها.. خير ... شنو المناسبة بوية.. بس لا الانتخابات
- إنت ما عندك سالفة غير الانتخابات ... اللي جوه ابطه عنز يجمع
* أنه.. جوه ابطي عنز.. لو إنت الداگه ديرم
- ليش الديرم جديد علي.. ما تذكر أيام العرس من جنت تگول أروح فدوه لها الديرم!
* إي.. دنيا.. اش ذكرج بايام العرس.. صدج لو گالو.. لو ضاج خلگج انكري أيام عرسج
- اش أذكر بعد من العرس.. صارت سوالف وانگضت أيامنا الحلوه
* إنتي بس إنسي صنادیک الانتخابات وداعتج تعود أيامنا الحلوة
- شلون أنسه وانتة وصويحبك مجلوب السلف ناهيين الديره
* يا معوده.. جاسمية دجوزي، وگومي صبيله لگمه وخل نتعشه فوك السطح على الهوا
البارد
- خاف تظن الديرم على مود نتعشه فوك السطح.. روح شوفلك جاره
* جاسمية.. وداعتج بس نبیض وجه بالانتخابات لا اشتريلج سوار ذهب وگردانه ذهب 24
حباية.
- هاي خلیها على حالک.. إذا ربح مجلوب السلف يعني كل شي يتخربط ولا ارید سوار ولا
گردانه
* شوفي جاسمية.. حسبة مجلوب السلف يخسر، هاي گطنة طلعيها من إذانج، البارحة
بمضيف جده الجبير حلف يمین يخلي السلف يدك إصبعتين.
- شلون يابه يدك إصبعتين.. شنو راح يجيب الماي والكهرباء للسلف! عشته
* دصبري وهسه اتشوفين.. اش كلتي؟! ده انعلي الشيطان وخل نتعشه فوك السطح
- هذا الحجي ما يفيدك
* جا... الديرم عليمن؟
- على أرواح اللي انغسلوا بالبرلمان وما حصلوا مرادهم.
* جاسمية.. لا تستعجلين.. هسه هم يرجعون.. عندهم ظهر وفلوس وعشاير وساده
- غير اوگف لهم بباب البرلمان بهذا الفاس واكسر راسهم
* انكري الله جاسمية.. باجر حساب وكتاب.. لا يغرج الزود، هذا مطر صيف
- شوف أبو جويسم.. مطر شته.. مطر صيف... أنه حقي ما يضيع.. لازم آخذ حقي
* ما طول هيجي.. ده گومي نتعشه فوك السطح والصباح رباح
- ده روح جيب صندوق العرس.. وبعدين أشوف شغلي وياك..

* والله اشتريلج سوار 24 حبايه.. اش گلتي.. آخذ الصينية ونروح نتعشى فوك السطح!؟

مشهد رقم (8)

جاسمية تغمز أبو جاسم: اليدري يدري

- * 500 صندوق بيهن غلط و20 % حسبوهن من جديد وألف شكويه من المراقبين وتاليها لاحظت برجيله ولا خذت سيد علي
- شنو القصة جاسمية.. اشو تحسبين بيديج وبرجليج.. أجيلج حاسبة اليكترونية؟
- * اي والله ينرادلي عليكترونية حتى أحسب صناديكم اللي لعبتوا بيهن شاطي باطي
- إحنا اللي لعبنه بيهن شاطي باطي لو جماعتج اللي جابتهم المعارضة البرلمانية الله يجرم، واحدهم ما يندل دربه.. تكولين شارب مي الثول
- * أبو جويسم هو إنتو خليتو واحد يندل دربه.. اشو يوم تحركون المستودع مال الصناديكم، يوم تحركون المستودع مال العتاد، يوم تكطعون الكهرباء، يوم الماي.. ما تكلي بعد منو يكدر يحسب حساب مال أودم؟!
- هي ما ينرادلها حساب أودم.. حسبوها حساب عرب.. وكلشي كعد بمكانه، لا أكو غلط بالانتخابات ولا اكو غلط بالحساب وأبوج الله يرحمه.. وطلعن الاوراق مال مجلوب السلف كلهن صحيدات مو مثل ما كألوا اولاد الحلال بيهن غلط.. دگومي صبيلي جاي
- * كون باجر يصير مجلوب السلف نايب.. دگن حيل خالاتي وياي
- جا أيش ما يصير نايب! همه اللي صاروا أحسن منه، شو صار له شهرين يمد البسط والعزائم وما يلحك، ما ظل واحد بالسلف ما شبع لحم من الخرفان اللي ذبحهن.. والله وبالله لو عدنه عشر نواب بالولاية مثل مجلوب السلف جان شبعنه لحومات طول السنة
- * انت خال عينك على البشت واليمني مو على اللحم... أدري بيك شلون سجه أبو جويسم.. اليدري يدري والمايدري كضبة عدس
- هو البشت هو اي علي.. أنه جنت أحسن شيخ دعايه لمجلوب السلف، خليت الولاية كله تصفك له وتهوس ليل نهار:
- وين اللي يريد كحيل.. مجلوب السلف ما ينام الليل ...
- ها ها اسمع يالحاكم:
- ننتخبه ومالك ملعب ويانه.. ننتخبه ومالك ملعب ويانه

مشهد رقم (9)

جاسمية تحتفل بالعيد على عناد أبو جاسم

- * أيباه.. شنو هالعزيمة.. إلمن.. كعك وشربت زعفران!؟
- إتغشم نفسك أبو جويسم.. ما تدري كل سنة أعزم بنات السلف بهيجي يوم
* لا والله ما أدري.. انشاء الله عيد زواجنا
- هاي فوكاها ... ليش عيد زواجنا ينرادله شربت زعفران!؟ أول شي رجع صندوق العرس
الفرهدته وي الانتخابات حتى بعدين نتحاسب.
* يعني قابل عيد ميلادي يرحم والديج!
- لا عيد زواجنا ولا عيد ميلادك ... عيد ميلاد الستين
* بوية يا ستين.. أنا بعد ما صرت أربعين سنة، شنو القصة!؟
- أبو جويسم.. عيد ميلاد الجمهورية الستين
* ها.. هاي هيه.. والله تستاهل.. ليش لا.
- ما طول تستاهل، دروح اشترينه شوية ملابس لأن بنات السلف بعد ساعة يلتمن
* بس بروح أبوج جاسمية.. ما كلتيلي.. ها الصحون والاستكانات الجدد منين
- ما تذكرهن.. الصحون مال يدي اللي ضامتهن من وكت الزعيم، ما تشوف صورته على
الصحن جنبه كمر.
* أگول.. بس انت شخاش بجيسج من هالعزيمة والهوسة، انت والجمهورية كجا مرحبه؟
- شلون أنه والجمهورية كجا مرحبه!؟ مو عمتي جانت مسؤولة الرابطة وعلمتنا قرايه
وكتابه، وأبوي حصل على كاع من الاصلاح الزراعي مال الزعيم.
* اش بقه منها.. كلها راحت، شحصلنه!؟
- اي اتذكر أبوي جان دوم يگول: الجمهورية خلتنه نحس إحنه أوادم، اي والله صدك.
خلصنا من الظلم وصار عدنه بويت بي ماي وكهرباء.
* والله انا ما شفت خير الا بزمان الفرهود.
- إي.. حقك، ليش ما تكول بزمان الحواسم، ما طول شريكك مجلوب السلف، شلون ما
تشوف خير. اكلك صدك جويسم شوكت تجيب النعال التسكام اللي وعدك بيه مجلوب.
* انت ما تجوزين، بويا بطلنه ما نريد نعل، حتى الانتخابات صارت هيونطه وراح يضيع
الخيط والعصفور.
- جا ما طول هيج.. دروح جيب الملابس... واخل نغني للجمهورية ... لا بد ما يجي العيد.

مشهد رقم (10)

جاسمية تشارك في المظاهرات ضد ربع أبو جاسم

- * ها جاسمية.. هاي زين.. حسج مطبك وزردومج يابس
- جا تريدني مثلك.. اشوف الاعوج واسكت.. مو تگولون الساجت عن الحك شيطان أخرس
* وشلون شفتي الحك وياه المظاهرات.. شو كلهم حفاي ومهتلفين.. هذوله يردون يصيرون
حكومة!!
- مو أحسن من ربعك الفرهدو مال الله وعباده.. شفت شلون شردو.. كبل للطيارات.. روحه
بلا رده، دفعت مردي.
- * لا شردوا ولا شي.. هي مناسبتين.. أولا ... حارة وراحوا يصيفون بلبنان وتركيا ويمكن
لاريبيل ومناك للندن.
- وشنهي المناسبة الاخرى بوية??
- * شنهو ما تدرين.. تسوين روح غشيمة!
- لا.. بالله، ده كلي بروح يدك!
- * جاسمية.. الحج.. نسيتي بيت الله.. الله وأكبر.
- أبو جويسم.. ربعك مال حج.. شو إيديهم بالحرام للعكس.. ما يعرفون غير البوك والنهب!!
- * لا تديرين بال.. كربت الساعة.. الانتخابات كملت.. دستروها على أربعة وعشرين حباية،
وبراس الدسة مجلوب السلف.. كلشي راح يصير على المرام.. وأنا ما ناسي سوار الذهب
اللي مواعدج بيه.
- انت ده حصل النعال التسكام وبعدين إحجي على سوار الذهب، هو صويحك يطلع منه
نعال حتى تجيب سوار ذهب.
- * لا وداعتج جاسمية.. بس تكمل حسبة الانتخابات نفرهد خزينة المحافظة تفرهد.. الا ابنيلاج
بيت يدك نوبة.
- شوف أبو جويسم.. انا ما اريد لا سوار ولا بيت.. انه ناذره نذر بس ينزاحون ربعك اذبح
ديج واوزعه على الفقره.
- * أيباه.. والله متكلفة... ديج توزعه على الفقره... شنو ذابحه عجل.. الديج لگمتين ما
يصير.. شتوز عين منه على الفقره.. خلي نسويه مزه انا ومجلوب السلف.. أحسن ما ياكلوه
ربع الحفاي.
- حفاي مو حفاي.. أقلها ما يبوگون.. هالطالعين مظاهرات حتى ينظفون الولاية من
الحرامية، من مجلوب السلف وربع مجلوب.
- * انت تظلين بهالعكل.. ماكو وره المظاهرات غير شلعان الكلب.. باجر عگبه تقوى
الحكومة ويلزموكم مثل الجريدية.
- ماطول احنه على حق، لازم نجيب أجلهم... احنه منصورين:
هاها.. منصورين... اسمع يالبايك.. منصورين.. اسمع يالبايك.
- ***



مشهد رقم (11)

جاسمية تهدد ربع أبو جاسم

- * إيه ... ما طار طير وارتفع / الا كما طار وقع ...
- أنا أخرج ... شنو هاي جاسمية.. صايره ترطنين شعر فصيح
* إي.. من وره ربعك ... اللي ما خلوا شي ما نهبوه
- يابه اش نهبوا ... هي شوية نفايات وما إلهن سعر بالسوك.. ما تشوفين شلون صار سعر
برميل النفط بفلس ونص
* ليش هو النفط قليل.. مو باعوا بالمليارات.. وشوفة عينك.. لا كهرباء.. لا مستشفيات... لا
مدارس
- إي قابل أنت مريضة وعينج على المستشفيات.. والله بس يربح مجلوب السلف بالانتخابات
لا أخليج تسبحين بالحليب
* لا حليب ولا شي.. انا حالي من حال ها الوادم.. نريد ماي وكهرباء مثل العالم.. ليش
الكويت أحسن من عنده.. شو كلشي عدهم.. ماي.. كهرباء.. مستشفيات.. سيارات.. وفوگاها
ما عدهم ولا نهر.. واحنا عدنا دجلة والفرات وميتين من العطش ... الله يقبل؟!
- جاسمية.. شنو كهرباء.. أجدادنا مو عاشوا بلا كهرباء وبنوا الملوية والزقورة.. يعني الا
كهرباء؟ يرحم والديج.. ما تنراد كل ها المظاهرات علمود الكهرباء ... أبوج الله يرحمه مو
كضه عمره على فانوس ولاله... وجان نظره سته على سته.. ويشوف مثل زرقاء اليمامة.
* يعني تريدينه نبقى على زمان كبل.. كل هالملايين اللي إجتته من النفط، ونبقى على
الفانوس؟!
- إنت ما تجوزين من النفط.. عبالك إبيج المرحوم طلعه من بطن الكاع، شو الانجليز
طلعوه وسوا فضل علينا بهالدولارات الخضر اللي گام تزخ علينا زخ؟! بس خليه نشوف
دربنه هال الدورة الانتخابية وخلي مجلوب السلف يرد النوب للبرلمان وشوفي شلون نربح.
* ما تكلي شنبربع.. مو الوادم كاتلهه الجوع من الفکر والعطالة بطالة.. لا تعيين.. لا
معامل.. لا شغل.. ما تكلي تاليهه وي ربعك?!
- شبيهم ربعي.. شو واحدهم لو بانيله جامع لو حسينية.. خو مجلوب السلف هاي سابع مره
يروح للحج، ووجههم منورة مثل البدر... تنگط نور، مو مثل ربع الكاتلهم الجوع.
* وجههم تنگط نور لو تنگط...، روح اسأل الوادم اللي طالعه مظاهرات بها الحر
الاگشر وتصيح نريد ماي ونريد كهرباء
ما تكلي وين ودوا الملايين وشلون فرهدوه.. إي هالملايين السفلة لو بانيلهم مدرسة،
مستشفى، خلك شارع مبلط.. اشو كلشي ماكو.. ايدنا والكاع.. ما شبعوا نهب.. اخ لو ربعك
يطيحون بيدي.. الا أسحگهم سحك.
* ده شوف الخايبة.. تسحگهم سحك! جاسمية.. هذولة واحدهم تحرسه عشيرة تفاگه..
إنت تردين تسحگيهم.. والله يخلوج بحلك الطوب ويسوج وذرة وذرة.
- ما يگدرون.. شحدهم.. إذا وراهم عشيرة.. أنا وياي الشعب كله.. شفت شلون شرد
مجلوب السلف وحراسه من واجهوه بالمظاهرات وهوسو:

ها ها ها.. وين يروح المطلوب انه ... وين يروح المطلوب انه

مشهد رقم (12)

جاسمية تغضب على ربع أبو جاسم

- * اللهم لا تجعلنا من المغضوب عليهم ولا الضالين
- بيّين زادت صلاتك ركعتين اليوم.. شنهى القصة... مسويلك مكسورة جديدة؟
- * لا والله جاسمية.. بس تذكرت الآخرة.. اللهم ارزقنا حسن العاقبة
- يا حسن العاقبة أبو جويسم..! انت وربك خلّيتو عاقبة وراكم.. شو إيدكم بالدهن
وسنونكم ناشبه بركاب الوادم مثل المنشار.. صاعد ماكل نازل ماكل.
- * يعني هاي ابدال ما تدعلي بالخير والبركة حتى الله يرزقني.. صرتيلي سجينه خاصرة؟
- أنا سجينه خاصرة لو إنت بالي الوادم بلوه بصويحك مجلوب السلف، كل يوم مسويله دگه
وفضيحة ما تنحجي؟
- * يا فضيحة جاسمية؟ أنت ليش تصدكين بحجي الناس المايخافون الله، مجلوب السلف يوزع
بهاالخيرات وما يلحك، البارحة جاب عشر بنكات هدية لاهل السلف.
- عشر بنكات؟! هي وينها الكهرباء حتى يجيب بنكات يا حظي، شو حتى المولدات ما
يشتغلن، يگولون ما عدهم نفظ. هاي عود إحنا أهل النفط.. الله يجرم.
- * جاسمية.. قابل الرجال يجيب كهرباء بشايلة للسلف؟! هاي شغلة الحكومة.. هو العليه
سواه.. بعد بيش تطلبية؟
- شلون ما اطلبه.. مو كبل شهرين اشترينوا صناديك الانتخابات وبگتوا بطاقتي الانتخابية
من صندوق العرس.. حتى فطومة العمية تگول بايکين بطاقتها ومزورين إسمها
- * هاي سالفة الانتخابات صارت قوانه مشخوطة ... حتى الحكومة جازت منها وانت بعدج
مجلبة بيها.. بس عاد يا جاسمية.. فكي ياخه!
- افك ياخه.. ها.. حتى تبوگون على كيفكم.. والله اوگفلكم بالمرصاد
- * هاي جديدة جاسمية بالمرصاد.. منين لاگطتها؟ بس لا تقريرن كتب مشبوهة من ورايه؟!
- ليش كتب مشبوهة ... قابل كتبكم الصفرة أحسن من كتبي!؟
- * إي بينت السالفة.. شنو يابه كتبنا صفرة وكتبج حمره...ها!؟
- حمره... زرکه... المهم كتب بيها علم.. مو مثل كتبكم مليانه خرافات وسوالف خرط
- * انا اخو المتصرف.. النوب كتبنا كلها خرافات وسوالف خرط ... لا.. لا.. هذا الحجي
ماينلبس عليه عكال، اني لازم اشوفلي جاره.
- والله أني اللي لازم اشوف لي جاره مو انت.. أنه اللي بطاقتي انباگت وصندوق العرس
مالي صار خرده ينباع بسوك مريدي.
- * اهو... هم رجعنه على حجي عام الاول.. بويه الناس اتبرعت بصناديك الذهب لمجلوب
السلف وانت بالج يم صندوق العرس مال زمان العصملي.
- أنه مالي شغل.. لازم نطلع مظاهرة غضب على مجلوب السلف وربعه، كبل ما يبوگون
كل شي من عدنه، لان ما بقه عدنه شي، واحنا ما نقبل بالذلة.
- * ليش ما بقه عدنه شي، مو مواعدنه مجلوب السلف على بيت أبو أربع دنك، ده اصبري
شجم يوم وخلي يطلع اسمه بمجلس النواب وشوفي شلون يجي الخير.

- والله الخير اللي يجي من وره مجلوب السلف لا أريده ولا أريد ذكره، عوده ولوده منه ومن إسمه. أنه ما أريد فلوس حرام.

* إي... هي بت الاوادم.. هي جايتها فلوس حلال وإحنه ما رايديها؟! هذا المقسوم إلنا، ماكو غير فلوس مجلوب السلف، قابل نذب الخير ورائنا، احنا منو عدنه بالحكومة غير ها المجلوب.

- شوف أبو جويسم.. أنه كلامي واحد.. ما أريد شي إسمه مال حرام.. ولمعلومك إحنا باجر طالعين مظاهرة غضب وهوستته: ها ها ها
فكوله الجنطة / / وهز ذيله ... فكوله الجنطة // وهز ذيله

مشهد رقم (13)

جاسمية تفضح ربع أبو جاسم

- * دگن حيل خالاتي وياي ... جبته برشيح العين ومراجشف جلاي
- ها جاسمية ... مطربة اليوم ليش ما تروحين للتلفزيون بلجن تصيرين بمجان حضيري أبو عزيز.
- * إي.. من نار البگلابي.. جا هي صايرة دايرة.. بعد كل ها العنجلية والطربگة وجيب قاضي ودي قاضي تطلع سالفة الانتخابات هيه هيه.. ما تكلي شلون دبرتوها.. شلون دسترتوها؟!
- النوب احنا دسترناها.. احنا ياهو مالتنا.. هو القاضي راضي.. المفتي شعليه!؟
* ماطول هيجي.. خلي القاضي باجر يفيدكم من تهجم الوادم على المنطقة الكشره.
- لا تخافين علينا.. ماطول السفارة الجبيرة يمنا.. ما حد يگدر يهجم علينا.
* جا... ما نفعت سفارة أبو ناجي نوري السعيد؟ اذكرك لو نسيت؟ يومن صاحبكم لبس عباية وسحلوه بالشوارع؟!
- راح ذاك الزمان.. جان أكو شارع يفتهم، يهز أكبر حكومة.. هسه الشارع ملتهى باكل بطنه، لا تظلين بعگل أهل گبل.. الدنيا تغيرت.. يا دوب تلگين واحد يقره ويكتب وشهادته ما مزورة.
* والله ما كو غير ربعك شهاداتهم مزورة.. ذولاك ربعه كلهم شهاداتهم من صدك والعالم كله يعرفهم.. لاجن انتو ما تنطون للوادم طريق.. انتو ماكلين الاخضر واليابس بحجة الدين اللي برئ منكم ومن حيلكم.
- هسه يا جاسمية قابل أني حارف رويسه!؟ مو كل الوادم تبوك وتنهب الاخضر واليابس.. احنا شطايح بيدنا.
* شوف أبو جويسم.. كل شط واله جرف.. أنتو ما تكدرن تسون الشط مرك والزور خواشيك.. احنا تاليها ناخذ حقنا بايدينا.
- يعني جاسمية انتي تهددينا؟! تره احنا مو تايهين... احنا اولاد عشاير أجاويد.. إذا تهددينا نعرف شغلنه وياج!
* والله تعرف شغلك ما تعرف... اولاد الملحة راح يسحلوكم بالشوارع واحد واحد.. حتى لو لابسين عمايم بلاك اند وايت.. وأنا وياك على مد الله.

مشهد رقم (14)

جاسمية تشارك في مظاهرات البصرة بدون أبو جاسم

- * المايسوكه مرضعة، سوك العصا ما ينفعه.
- يبين جاسمية صايرة حكيمة!! جا ليش شاده راسج وركض للمظاهرات من الصبح، صايرتلي عنتر بن شداد.
- * كل هذا الفساد اللي صار من جوه راسكم، والناس تلوج على شربة ماي، وماتريديني أركض للمظاهرات!
- ليش شصار؟ قابل أهل البصرة لازم يشربون ماي أربعه وعشرين ساعة؟ شو أزمة المياه بكل العالم، حتى بمصر أم الدنيا أزمة ماي، خو مو بس بالبصرة.. قابل إحنا أحسن من أم كلثوم لو من السييسي؟!
- * بمصر... بالسودان.. أنه ياهو مالتى؟؟ أنه أشوف بعيني الناس بالبصرة كاتلها العطش، والتسم طايح بيهم كبار وصغار، المستشفيات مليانه.. شنو ماكو ذمه؟! ماكو ضمير شلون نسكت؟
- جا ما طول هيجي.. ما طلعتي مظاهرات يمن بوش سمّم العالم بالنابالم وضرب البصرة باليورانيوم! هم كولي ما أدري..!
- * بوش طلابته جانت ويّه صديّم.. اثنينهم بلوه بيهم إبتلينه.. مخلص السالفة.. لا تلف وتدور.. انت ويه أهل البصرة العطاشى لو ويّه الحرامية؟
- والله يا جاسمية أنه ما داشوف الخيط الاسود من الخيط الابيض، وروح يدّج السالفة لاكفه طين، ما كو جاره.
- * لا تسوي نفسك غشيم.. الخيط الابيض ميين.. هذوله أهلنه.. ما عدهم لا ماي ولا كهرباء.. وين يرحون؟! مو حقهم يهجون بالشوارع يطالبون بحقهم.
- يعني هسه بس هّمه ضايح حقهم يا جاسمية.. إحنا شمحصلين؟ مو هم ضايح حقنا.. فوكاها نروح نتظاهر وي المكاريد ونخسر الاول والتالي؟!
- * أبو جويسم.. إحنه شعده حتى نخسر الاول والتالي.. أنه حتى بيت سكن ما محصله.. يوميه أبو المّلك جاي يريد إيجار الغرفة ويزيد الإيجار بكيفه.. عليمن خايفين؟!
- * إي شجاج ما تصبرين؟ مو مواعدهه مجلوب السلف ببيت أبو أربع دنك؟ على كيفج ويانه.. خلي يصير بالحكومة وتدلي.
- شوف أبو جويسم.. أنه لا أريد من الحكومة صدقه ولا من مجلوب السلف رشوة.. أنه أطالب بحق بيدي.. وباجر من الصبح طالعه للمظاهرة.. تريد تجي اهلا وسهلا.. ما تجي.. الله وياك. كلمن يروح على خرّ إذنه.

مشهد رقم (15)

جاسمية وحكومة أبو جاسم


- * إن جان هذي مثل ذيج // خوش مرگه وخوش ديج
- خير جاسمية؟! يبين اليوم عازمته على ديج.. عزيمة لو نذر جفيان شر ودفع بلاء؟!؟!
* لا عزيمة ولا نذر.. شو القيمة والتمن بالشوارع.. بعد شنو ديج ونذر.. إنتو ما يلحك الكم
لا ديج ولا دجاجة..
- يابه شصار.. قابل الديج بمية وألف.. شويه حركي إيدج وبحبجها.. إحنا هم ربعج
* لا بوية.. انتو ربع الحكومة مو ربعي.. أني شعندي.. حال مال!!
- يا معوده يا حكومة.. هي ليهسه ما متشكله.. واحد يجر بالطول وواحد بالعرض... شبالينته
بلوه.
* هاي هم من يمكم.. حتى تضربون للصبح.. لا حساب ولا كتاب.. منو يحاسبكم.. لا ريس
ولا مرؤوس
- جاسمية شنضرب؟! شو الميزانية فارغة.. كل الفلوس ودوها للبصرة حتى يسدون حلوك
المتظاهرين.
* هالنوب ودووا الفلوس والميزانية للبصرة.. هاي خوش جذبه.. أهل البصرة يحلفون يمين
يكولون الحرامية مسيطرين على كل شي.. والناس ما عدها لا ماي ولا كهرباء.. وفوكاها
التسمم ضاربهم وين ما يوجعك.
- إي التسمم مو جديد.. من عهد الملك فيصل الله يرحمه والناس تتسمم بالغاز والنفط والمائي
المالح.. هاي المشاكل ما لها علاج.
* ليش ما لها علاج.. لو اكو حكومة نزيهة ومسؤولين مو حرامية.. جان لا اكو تسمم ولا
عطش
- والله جاسمية ما تصير إلج جارة.. حتى لو السمج يتسمم بالشط تكولين صوج الحكومة، إي
قابل الحكومة تسمم الوادم؟! همه يشربون ماي من النهر.. ما يفورونه.. طبعاً يتسممون.
* يعني هسه صار صوج الوادم.. هاي الالوف اللي طالعة مظاهرات.. تنحل قضيتهم إذا
يفورون المائي.. هاي وين لكيتها أبو جويسم؟! دشوف ربعك ما خلوا حال ولا مال على أهل
البصرة.. لا ماي ينشرب لا كهرباء لا شغل لا عمل.. وفوكاها النفط بالملايين يتصدر من
البصرة.. وما كو قبض.
- انت ليش ما عندج صبر؟ دخلي يصير مجلوب السلف بالحكومة وشوفي شلون نربع ..
والله يسوي البصرة مثل دبي.
* إي تمام! أبو جويسم روح اشترى بعقلك حلاوة.. صويحك لو بي خير جان سوه السلف
زرق ورق.

مشهد رقم (16)

جاسمية ترشح للوزارة على عناد أبو جاسم

- * نايل جتلني ونايل غير الواني / ونايل ببحر شوكك طحت / سهران خلاني
- اي بالله جاسمية.. كملني.. هاليوم سويحلي
* ولك يا سويحلي.. هذا من ضيم كلبني
- اسم الله على كلبج جاسمية.. شعندي غيرج.. اكول سمعتي بالخبر الجديد؟
* خير يابه!؟ انت ما وراك غير الاخبار المصخمه
- لا والله.. اليوم خبر تازة... يگولون ريس الوزارة، يعني الراس الجبير بالحكومة، طالب
من الناس ترشح للوزارة حتى يختار منهم وزراء.
* اي.. شكو بيها!؟ خوش سالفة.. بلجي يحصل على ناس أوادم يسويهم وزراء.
- انت كل عكج يحصل على ناس أوادم.. مو راح اليسوه والمايسوه يرشح نفسه، وتعال
عمي شيلني.
* ليش تعال عمي شيلني.. يسوون لجنه من الختيارية ويستتكون شكم واحد ابن اوادم مو
حراميه ويسلموهم الوزارات.
- يعني هذا ابن الاوادم من يصير وزير ما راح يبوك؟. قابل ضارب لقاح ضد البوك! اشو
الدولارات والدنانير جوه إيده بالمجر مال الميز.. وياخذ شمايريد مو أبو المثل يگول..
ماطول بالنخله تمر ماجوز من شرب الخمر
* أبو جويسم.. شجاب هاي على سالفته.. يا تمر يا خمر!؟ أنت ما بالك غير السوالف
المكسرة؟ يعني انت شايف كل الناس حرامية!؟ أبو جويسم روح اقره شلون سوه مختاير
محمد بماليزيا حتى تعرف الشريف من الحرامي
- منو يابه هذا مختاير.. هو مختار واحد عدنه بالسلف وبالينه بلوه.. هالنوب مختاير ماليزيا..
جاسمية خلينه بضيمنه.. وين تردين بينه.. مختاير ماليزيا... هذوله وين لكيتهم!؟
* أبو جويسم.. هذا ريس وزارة اسمه مختاير.. شوكت تتعلم!؟ لو بس تعرف تفرهد مال الله
وعباده.
- آني أفرهد.. ده شوفي مجلوب السلف شلون صار آفه من صار نايب.. كام يبلع عمارات
ومارسدسات.. أنه شمحصل؟ تاير مال سيارة ما قابض.
* جا وينه حجيك ذاك.. تگول نبربع بس يصير مجلوب السلف بالحكومة!؟ اشو ايد من وره
وايد من كدام.. مو كتلك ربعك ما بيهم خير.. بس يعرفون ينهبون مال الوادم.
- كلها من وراج.. خاله خشمج بها السياسة العوجة مالتج.. والله شنو حقوق المرأة.. يابه
كطعتي خبزته.. حتى مجلوب السلف كلب عليه من وراج وره سالفة حقوق وعقوق المرأة.
* انت ما تعرف شكتر حقوق المرأة ضرورية للشعب وللوطن.. ولعلمك أنه رشحت على
وزارة المرأة ووديت طلب لريس الوزارة.
- ها.. مو كلت اليسوة والمايسوة يرشح نفسه.. انت بلا وزارة الله ما يجرعج.. هالنوب
تصيرين بالوزار!! والله خوش.. اكيد راح تكطعين رزقي هينوب.
اگوم أقدم طلب آني هم بلكت اصير وزير الرجال مو بس انت

وزيرة المرأة. حتى يصير دك الاصبعين للصبح.



مشهد رقم (17)

جاسمية تودع الرئاسة بحضور أبو جاسم

- * خايب هو.. خايب هو.. خلاني وراح وراح... خايب هو والكلب مامرتاح... خايب هو... ما اريده خله يروح.. خايب هوب... - أنه اخو المتصرف.. شنو هاي جاسمية، شجاج تسودنتي؟! فضحتينه * لاتسودنت ولا شي.. وين الفضيحة؟! هي بسته بالمناسبة - شنو المناسبة.. عرس.. طهور.. حنًا؟! * اي عرس وحنه وطهور.. اشرايد بعد أكثر؟ - يابه على كيفج.. بها الليل.. الوادم نايمه.. وين العرس وين الطهور؟ لاحول ولا قوة . * ما سمعت بالاخبار اللي ذاعوها بالراديو؟! - وانا ما عندي شغل وعمل.. يعني أعوف رزقي واكابل الراديو؟ * أبو جويسم.. يا شغل؟ هي كلها شجم كلاو تلبسهن للمكارييد.. وتفرهد براحتك.. يا شغل.. يا عمل؟! - ليش جاسمية.. هذا التعب من الصباح لليل واكف بباب الحكومة وأخلص معاملات الوادم مو بعينج؟ * لا عيني، خليها سكتة.. انا شطالع بيدي.. انت وويه الحكومة راسين بقد لباس. - هاي فوكاها النوب انا والحكومة راسين بقد لباس.. صدك لو كآلو.. سوي زين وذنب بالشط. * هسه ما علينا.. الرئيس وربعه راحو لذار حقهم. - ها.. يا معوده.. شنكولين؟! احنا شعدنا غير الرئيس.. رزقته بيده.. وداعتج بلا الرئيس عانه ما نسوه. * لا يابه.. انتة عانه ما تسوه مو احنه... احنه نسوه أبو العانة.. اذا انت تفرهد باسم الرئيس.. احنه ما ناكل حرام. - يعني هسه صار جويسم ياكل مال حرام.. كل هذا التعب والركض بالمواكب واللطم.. مو بعينج؟! * انت ما تركض ولا تلطم على الحسين.. انت تلطم على الهريسه. - اي قابل الهريسه مال الخفوج.. هي هريسة ابا عبد الله.. واحنا ببخته... ما كنتيلي شكال الراديو؟ * ذاعوا بالراديو يگولون الرئيس وربعه طلوعوا تقاعد.. تدري شكتر طلعلهم تقاعد؟ - لا والله.. يعني شيطلعلهم؟ غير مثل تقاعد أبو جويسم، اربعطعش ألف دينار وبالزايد سباعطعش ألف دينار. * خاف ما تقبل.. ولك أبو جويسم هذوله تقاعدهم بالدولار مو بالدينار.. دولار يطك دولار - بويـــــــــــــــــــــه.. بالدولار؟! جا گولي تفرهدت الخزينة.. اذا ريس وتلات نواب كل واحد ياخذ سباعطعش الف دولار.. يعني كسر بجمع تصير ألف تالاف دولار... اي بالله تفرهدنه.

* عمت عينك أبو جويسم.. جا وين صويحك مجلوب السلف.. مو كلت راح نبربع.. ولك
نهبوا الخزينة.. شبقالك؟! ما مش غير التفاليس.. روح.. روح الحك على الهريس والطم..
هاي قسمتك.
وخايب هو.. خايب هو.. خلاني وراح وراح ... خايب هوب

مشهد رقم (18)

جاسمية تصرخ أين حقي يا أبو جاسم

- * جيب الليف ودي الليف.. تاليها لاحظت برجيلها ولا خذت سيد علي.
- خير جاسمية.. منتهي تزوجت؟ بس لا مجلوب السلف تزوج بت سيد علي!
* شوف البطران!! انت ما عندك غير هالمجلوب؟!
- إي مو سمعت بيها رجل ... كلت منو يتزوج بهاليوم الاكشر غير هالملاعين.
* أبو جويسم.. انت ما سامع المثل: ماحظت برجيلها ولا خذت سيد علي!
- إي.. ذكرتيني بالمرحومة امي، جانت دوم تجيب هذا المثل.. بس شنو رباط السالفة؟
* رباط السالفة.. أوراقي اللي رشحت بيها مثل ما راد أبو صحبه، لكيتها مشمورة بالزبالة.
- انا أخو المتصرف.. صدك.. جذب... عود انا ازامط واكول جاسمية راح تصير وزيره ثقافة.
* يا ثقافة أبو جويسم.. الحكومة تريد واحد يبصم ... حتى كل شي ما يتغير.
- ليش هي الثقافة ينرادلها واحد يفتهم؟ اشو من قالو بلى لازمها ربع مجلوب السلف وخيرهم مايفك الخط.
* غير حسبالنه أبو صحبه يدور ناس تفتهم.. وانا هم مثل الصدك قدمت أوراقي، وفوگاها دزيت الـ (C V).. عبالى صدك راح يقرون الاوراق والبيانات.
- تردين الصدك.. لو مخليتني اوصي مجلوب السلف، وادهن زردومة بكم دولار..جان سواها راس مال .
* أبو جويسم عبالك هاي السالفة تخلص بكم دولار؟ هاي ينرادلها دفاتر، شكبان دولارات ما سمعت الربع شكّد دفعوا.. مو طلعت الريحة بالفضائيات.
- ماطول هيح.. خلينا نجمع دولارات.. وعلى الدورة الجاية قدمي من جديد، وأنه اوصي مجلوب السلف.. ماكو غيره يدبرها.
* شوف أبو جويسم.. لو تنقه بس هاي الوزارة بالدنيا ما انطيهم رشوة ولا اروح لمجلوب السلف وامسح جتافة.. لو تطلع نخله براسهم... لو أني.. لو همه... وإن غدا لناظره قريب.
- ها.. اشو ترطنين بحجي مال كبار... شنو لناظره النوبه بويه... لا يكون ضربت براسج الوزارة مال أبو صحبه؟
* لا.. أبو جويسم... ما ضربت براسي الوزارة.. لازم ناخذ حقنا من ربع مجلوب السلف.. ولازم نشد حزام ذيب.. لان ما يطلع من ايد ربك لا وزارة ولا تجارة.. وراح تظل الوادم تعلق بالمصايب والطلايب.
- فال الله ولا فالج جاسمية.. لا تكالبين الدنيا فوك روسيا.. باجر يجي مجلوب السلف للمضيف وفتهم منه شنو مستقبل الوادم.
* انت صدك كلك كلب سمجه.. بعدك تترجه من ربع مجلوب السلف خير... مو صار سنين يقشرون علينا.
- يعني شلون.. ماكو جاره؟!
* أبو جويسم ما النا غير ناخذ الفاس ونطلع لهم للجرباء. ونصيح: أين حقي، أين حقي!!

مشهد رقم (19)

جاسمية: اكلها طريمش يا أبو جاسم

* يايمة انطيني الدربين.. انظر ولفي واشوفه
لابس عباء شغل الدير... تبرج ما بين جتوفه ...
- هذا الدربين شنو النوب... صار بيها ولف... يا عباء جاسمية!! لا شغل الدير ولا شغل
الصين..
ضيعنا الصاية والصرماية. بسّج تصجمين بينه.
* جا من اكلك لا تركض وره مجلوب السلف.. ليش ما تسمع كلامي؟! ها الاجيت أيد من
وره وأيد من كدام.
- ليش هو بس أني ... اشو كلها تركض وره مجلوب السلف.. حتى أبو ناجي يركض، عبن
داهن زردومه ببرميل نفظ
* انت شعليك بيهم.. همه وي أبو ناجي حبايب من زمان.. والعنده حبايب يشبع كباب
- أنه كالت بلجن أحصل لي لگمه.. خلگ وزير.. مدير بلدية.. شو حتى لحسه ما صارت من
نصيبي
* أبو جويسم.. لگمه بذله ما تنفع.. شوف لك جاره.. ما يفيدك غير جد ذراعك
- أنه.. شسوي ما تگليلي؟ ما تشوفيهم مثل جلاب الغاضرية.. منو يگدر عليهم؟!
* صدك. وحدك ما تگدر عليهم... لكن أنه وياك وأهل السلف من نلتم وكل واحد ياخذ فاس
بيده.. نلن سلفه سلفاهم ونخلي طشارهم ماله والي.
- جا ماطول هيحي.. عليهم بويه عليهم ...

مشهد رقم (20)

جاسمية: تفرّد البنك يا أبو جاسم

- * على الويل ويلي سطره / ابن الحمولة سطره
باك الحجل واسكطه / وخله الرجل خاليه
- خير جاسمية منو باك الحجل؟
- * يا حجل أبو جويسم.. أكبر من الحجل
- لا بالله.. شعدهن أكبر من الحجل.. قابل باكو الورور مالي؟
- * ولك أبو جويسم باكو البنك
- البنك!! شلون يبنك، مو بي قاصه حديد؟
- * والله انت كلب سمجه.. هو أبو القاصة منو... غير مجلوب السلف
- يعني مجلوب السلف باك البنك؟ والحكومة وين؟!
* الحكومة نايمة ورجليها بالشمس
- بروح أبوج ما تكليلي شلون يبوكون البنك؟
- * انه أكلك.. مجلوب السلف بايك القاصة وضام الملايين ببيت عمته
- ها.. وعمته فضحته؟
- * لا.. شلون تفضحه عمته.. ربك سبحانه وتعالى فضحه
- معقولة؟
- * إي معقولة.. الله ما يضرب بحجار، إجت مطرة كلش على سطح بيت عمته وغركت
البيت
- إي.. وشجاب المطرة على مجلوب السلف وفلوسه؟
- * المطرة غركت البيت والدنانير طوفن بالدرب... والناس من شافت الملايين طايغه
راحت ركض لمركز الشرطة ولموا الدنانير وسلموهن للحكومة
- وشلون عرفوا هاي مال مجلوب السلف
- * شافوا توقيع المحفوظ مجلوب السلف على الدنانير وعرفوا هي مالتة وضامها إبيت عمته
- كولي غيرها جاسمية.. لاتنكلب بينه الدنيا.. صايره دايره، واحد ضام البنك إبيت عمته؟!
* إي صايره.. ما سمعت؟! ناقشوها بالبرلمان ودرزوا عليّه شاهد لان أنه شفت الدنانير
مسيسه بالشارع.
- جا.. مالميتينه شجم مليون نروح بيهن للحج
* عمت عينك أبو جويسم تريد تروح للحج بفلوس مجلوب السلف؟

مشهد رقم (21)

جاسمية تلبس سترة صفراء دون علم أبو جاسم

- * اكل.. حصلتني وظيفة بالإطفاء لو بالحريق؟!
- لا يابه ... لا بالإطفاء ولا بالحريق
* لعد شنو هاي السترة الصفرة طالعة مثل كاهن بوذي، لابستها للغو؟! عيوني كامت تغوش.
- هسه عيونك كامت تغوش من هالستره؟ جا ما غوشت من شفتوا ربعك براميل النفط؟!
* أني يا هو مالتني.. قابل أني واكف على الكاك مال النفط؟ هو مال الحكومة. والاختوه ربع
مجلوب السلف هم حكومة.. منها واليهها.
- تالي صار النفط مال الحكومة.. مو مال الشعب.. هاي بيا قانون وبيبا دستور؟! النفط مال
الشعب.
* جاسمية.. روعي اشترى بعقلج حلاوة.. منو يبيع النفط والبنزين بالمحطات؟ مو الحكومة؟!
هو النفط مالها وهي تبيعه للناس.. بعد يا شعب يا بطيخ ... انتي تظلين بها العقل؟!
- أبو جاسم.. يبين داهنين زردومك بجم برميل نطف.
* إي تمام.. مو اني شريك مجلوب السلف من زمان النفط مقابل الغذاء. أني يا هو مالتني.. لا
بالعير ولا بالنفير .
- إذا ياهو مالتك.. ليش تركض لمجلوب السلف.. وتركب وياه بالسيارة؟
* هاي هم لاحكتني عليها.. ركبة السيارة.. الله وأكبر، الرجال وصلني لراس الشارع، الله
وكيلج لا ما كل ولا شارب، هاي خطة العباس.. اذا حاط شي بجيبي.
- أبو جويسم.. مو البارحة شفت الدولارات جوه راسك.. منين؟ ها، خطة العباس؟! لا تكول
مالي شغل.
* يابه شخبصتينه.. هنّ عشرين ورقة. تكول شايفه عندي بنك الرافدين.. ماطول عينج
ورا هن.. اليوم راح اخسرهن.
- لا تلعب بيهن قمار ما تخسرهن.. طبعاً.. مال اللبن للبن... فلوس حرام.. وين تروح؟
* جاسمية بروح أبوج ماكلتيلي.. شنو هالستره الصفرة.. مو مال حريق؟ والله لا يكتلج.
- لا مو مال حريق.. اريد اطلع بيها مظاهرة.
* وهاي السترة الصفرة شنو... ما عندج عبايه، لو طالعة موده جديدة أم الاطفائية!
- لا.. هاي تعلمناها من فرنسا.. تظاهرة بالفرنسي ها الشكل.
* جاسمية.. الزمي حدج.. لا تكولين فرنسي.. تره وصلت لليافوخ.. كلشي سمعنا.. حجي
فرنسي، ركص فرنسي، ما أدري شنو فرنسي، هالنوب مظاهرة بالفرنسي.. هاي ما صايره
ولا دايره!!
- إي أنت ما تعرف شي زين بالفرنسي بس تعرف المكسرات، هي فرنسا اللي طلعت للناس
الحرية والمظاهرات والكومونة.
* انا أخو المصرّف.. وصلت للكومونة.. لا بالله احتركننا.. خلي أشلع

مشهد رقم (22)

جاسمية زعلانه على ترامب وأبو جاسم

* والله مو خوش دگه.. يگولون امريكا متقدمة وتمشي كدام العالم الحر، جا شماله ترامب الاكشر يجي على غفلة... لا من درى ولا من سمع.. شنو حرامي؟!!!

- جاسمية.. شنو حرامي؟! الرجال مو زين عايف عيد راس السنة بامريكا وجاي عدنا.. هذا لو رايح لعمامنا لو لخوانا جان دكوله اصبعتين وسووله عراضه منا للشوملي.

* هاي فوگاها.. تريده نسويله عراضه.. غير اليجي ضيف يدك الباب.. يگول بسم الله.. يگول احم.. خو مو يجفت علينا جفت.

- انت ما تجوزين من سوافج.. قابل هو ترامب ابن عرب حتى يدك الباب؟ الامريكان إذا رادوا يسلمون يگولون هليو هليو، واكيد من الطيارة گال لجماعتنا بالحكومة الله يحفظهم: هليووو هليووو.

* وين گال هليو هليو.. يابه... اشو لا أحد من الحكومة گال جاينا خطر ولا أحد جابه بالطاري.. جان حضرنا قوري جاي على الاقل.

- جاسمية.. انت صاير بعقلج شي.. هو الامريكي يشرب جاي.. شنو هو أبو جويسم؟ هذوله ما يشربون الا ويسكي، وبدال الجاي يشربون دبسي وكوكا.

* الدبسي موجود مو مشكلة.. الا الويسكو منين نجيبه.. مو السيد حرّمه وگال حرام على شاربه وبائعه وناقله وجالسسه وجار جار شاربه ...

خليتو ويسكي.. عزه.. صخام.. اشو بس عرك أبو الواوي ينباع قجغ بالولاية وحبوب تسودن الوادم، حتى ابن صبحه كام يشرب عرك أبو الكلجة.

- هسه هو ترامب عايز على الويسكي المغشوش مال حكومتج المجرقة، هو اكيد جايب وياه صندوق صندوقين ويسكي بمناسبة اعياد راس السنة للحكومة والحبريش.

*ها أبو جويسم.. اشو صارت حكومتي مجرقة، مو انت وربعك تركضون ليل ونهار وتطشون ملابس ودولارات حتى يصير مجلوب بالسلف بالحكومة، وجماعتك واحد يجر بالطول وواحد بالعرض، واحد يجر بوزير الدفاع وواحد يجر بوزير الداخلية حتى انقطع قيطان الحكومة وعلى كولة حسين نعمة:


بت بعد بالدلال / جاهل يعت بيه ... يبجي من اصيح عليه/ يقطعه من اخليه.

- اي والله ذكرتيني بمجلوب السلف.. اكيد هسه كاعد وي ترامب ومخلي رجل على رجل ويجريع بالويسكي.. ايباه.. ما عزمي.. جان اصفي دماغي ببيك دوغلي بلاك اند وايت واضرب جكاره روثمان اصلية مو جكاير مغشوشة مال حكومتنا المليانه تين.. عبالك زقنبوت.. الله يلعنكم من حكومة حرامية.

وداعتج جاسمية كلاص ويسكي بلاك اند وايت يخلي الواحد يروح بفاله ويدك صفكه للامريكان والانجليز على هالمشروب اللي ينزل يهلهل بالبلعوم.. بس شسويله لمجلوب السلف ... اكيد راح مستعجل وما لحك يخبرني.. يالله على الجايات... ما طول ترامب خله رجله براس حكومته، راح يتعلم ويجي كل يوم.. النفط موجود والرجال كالهنا من أول يوم..

يريد فليسات النفط بالكوه مو بالمروة.. احنا شخسرانين همه يطلعون النفط وهمه يأخذوه..
ألف عافية.

* إي مو هو النفط مال الخلفوك حتى تتبرع بي.. ألف زقوم بحلك ترامب الاكشر، هذا النفط
مال الشعب وهاي الفاسه مالتي واني طالعه مظاهرة على الحكومة الساكتة على الحرامية
واشوف منو يوكف بوجهي... لازم أجيب أجلم على ايدي.



مشهد رقم (23)

جاسمية تغني أجلبنك ياليلي.. يا أبو جاسم

- * يلوم المادره بعلتي شامر ها ...
- ها.. أنا أخو المصرف جاسمية.. خير.. خو ما كو شي؟
* لا.. ما كو شي.. حكومتكم المايها طعم.. لا شيش ولا كباب
- يا معوده.. بس گولي... أنا عندج
* هاي من شوكت.. بعد ما فرهدت صندوق العرس!
- أهو.. هم رجعنا على سالفه عام الاول.. هسه شتردين.. فلوس؟؟ أنا حاضر!
* إي.. مبين عليك الخير.. شو لابس نعال جديد... من أين لك هذا؟
- الله وأكبر.. هسه إنت حاسدتني على هذا النعال، كاعدتلي ركبه ونص، من عين لك هذا
* لا.. مو حجيك تگیل اليوم.. مال شتردين آني حاضر.. هاي مو من عوايدك
- وداعتج جاسمية.. أخلي الزور خواشيج والشط مرك.. إنت تامرین.
* ما كتلي.. من أين لك هذا؟
- شوفي جاسمية.. مجلوب السلف صار جبیر بالوزارة.. واحنا راح نبربع
* هم رجعنا على المجلوب.. ما تفك ياخه من هالطلاية
- لا.. هسه أسولفلج وانت احكمي.. مجلوب السلف صار
مدير التشرييات بالوزارة واني أساعده بعد الدوام
* مدير تشرييات شنو.. لا يكون تريد تكول مدير تشريفات
- ما أدري.. يگول صار مسعول الضيافة
* هاي هيّه!!
- إي جا هيه قليلة... يا جاسمية.. ما يسوي الوزير شي الا هو يعرف.. واسطته
صارت يم نجم سهيل
* وانت شنو محلك من الاعراب؟ تشرب شاي ويه الوزير بعد الدوام؟!
- لا.. شمالج كلب سمجه.. أروح بعد الدوام ومجلوب يناوشني هل الله قاسمه.. لان آني
أمشي الواسطات
* يعني تاخذون رشوة.. خوش والله.. وجاي تكول إطلبي شتردين!
- إنت ليش تسميها رشوة.. سميها عمل خير وهدية لوجه الله.. العقربون أولى بالمعروف.
* يا اقربون! شنو أنت عم الوزير، خال الولد؟ لو مجلوب السلف من عقربون الحكومة؟
- خليها سكتها يا جاسمية.. لا تفضحينه.. هاي الشغلة هم راح تسديها بوجهه
* شوف أبو جويسم.. تجوز من هالسالفه تجوز.. لو أحلف بهاي المسية.. آخذ الفاسة
والبس السترة الصفرة والم الناس عليكم
- جاسمية مجلوب السلف مواعدني بنعال تسكام حياوي.. انت ليش تكطعين رزقنا
* اسمع أبو جويسم: أجلبنك ياليل ثعاش تجلبيه.. طاري هالجلب أرجوك لاتجيبه

مشهد رقم (24)

جاسمية ومزة عدس أبو جاسم

- * أبشرج جاسمية... سواها مجلوب السلف
- خير.. أبو جويسم؟ شنو البشارة... ياالله
- * مو كتلج من يصير مجلوب السلف بالحكومة نبربع
- ما معقولة.. مجلوب السلف يسوي شي بي خير!!
- * وداعتج.. سوّه تخصيصات ما كو منها لشهر رمضان
- ليش لشهر رمضان.. شنو ناوي يصوم من هسه.
- * والله إلج خلك.. ليش ما تعترفين بالخير اللي جاينه
- إي غير تفهمنا شنو الخير.. حتى نعترف بيه.
- * جاسمية.. تخصيصات.. خير.. خير
- إي د حجي يا أبو جويسم.. مو طكيت مرارتي
- * أكلج.. كل واحد من عدنه راح يحصل على نص كيلو عدس بشهر رمضان.
- صدك.. جذب.. هيه هاي البشارة... د گول غيرها
- * جاسمية.. شوية شوية يجي الخير.. خو ما تردين كلشي مرة وحدة
- يعني على گولت المطربة صباح أكل العنب حبة حبة.. مو هيح؟
- * والله.. انت ما ترضين بحليب العصفور
- هسه صار العدس حليب عصفور.. والزقنبوت اللي تشربه. حليب سباع!
- * ما تصيرلج جاره.. ترحين وتردين على حليب السباع.. هوه بطيل زحلاوي نشربه أنه و مجلوب السلف علمود نصفي الحسابات براحتنه.
- الحسابات.. لو الفرهودات... حتى البشارة ما لتكم شوية عدس.. الله يطيح حايطكم.
- * إيه مو ما تدرين.. اذا كل مواطن ياخذ نص كيلو عدس يعني 20 مليون كيلو عدس ينراد للعراق واحسبها كل كيلو على دولار دولارين.. هم تصير مليار لو مليارين دولار.. شعبالج گوتره.. كلها محسوبة.
- إي صدك.. جوز معدود بجراب مشدود.. شلون حسبتها يابه مليارين دولار.. ليش ما تشتغل محاسب بلانجو بوال ستريت؟ إذا مستشارين مجلوب السلف هالشكل يحسبون لا بالله تفرهدت الخزينة بس على العدس.
- * جاسمية.. انت شمفهمج بالحسابات.. ليش هوه بس سعر العدس.. مو ينرادلها كومشونات.. وقومسيون.. وخشمك.. إذنك.. وهاي لعمك... وذيح لخالك.. تصير كسر بجمع مو مليارين، توصل لثلاث مليارات.. شعبالج؟ هذا حساب حكوووومة.. مو حساب عمج محيسن أبو الثلج.
- ماطول هيح إنت قوي بالحسابات.. گوم جيب الدجاجة مال مكرمة صديم حتى أطبخها وي عدسات مجلوب السلف وأسويلك مزة للزحلاوي مال الخفوك... بلكت تصحه وتجوز من ها المجلوب.

مشهد رقم (25)

جاسمية و غراميات أبو جاسم

* فاسقني كأساً وخذ كأساً اليك... فلذيت العيش أن نشتركا
- هاي شنو أبو جويسم... شو هم رجعنا على الكاس والطاس!
* أني يا هومالتي... هو السيد الحبوبي يگول ناوشني بيك زحلاوي
- الله لا يرضه عليك.. ذبيتها برغبة السيد.. شجاب السيد على الزحلاوي مال الخفوك؟!
* يعني قابل أني ناظم هاي القصيدة العصماء.. ما سمعتي داخل حسن يغني
ياغزال الكرخ ياويلي عليك.. انا الياويلي
- لا يابه داخل حسن ما غنه هاي الاغنية.. داخل حسن غنه: يمه يا يمه ...
* إي انتِ ظلي بها العقل.. البارحة مجلوب السلف سمعنا قوان مال زمان الاول.. أبو كاظم
يعني:

اويلي يا ويلي.. انا الياويلي
- والياويلي شجابها على غزال الكرخ
* يعني غير غزلان الكرخ ياخذن العقل.. مخصوص بعد البيك الثالث.. ايباه.. شلون
زحلاوي عد مجلوب السلف.
- اي بالكرخ غزلان؟ وهنا بالرصافة احنا طليان.. هذا قصدك ها؟؟
* لا.. وداعتج جاسمية.. سويلي ما عون جاجيك.. اجيلج باجر جرغد بريسم
- وهذا صاحبك شلون يگول:
فاسقني كاسا وخذ كاسا اليك فلذيت العيش أن نشتركا
* ليش شببها.. كاس اله وكاس الي.. السيد ما كاييل غلط
- لا.. هو إذا صدك يحب، ما يؤمر حبيبه
* اكج.. انتِ هواي ثخنيتها.. هو بيك زحلاوي.. شدخلتها بايراد ومصرف..
متگليلي شيگول يرحم ذلك الأب؟
- يگول:

اتهنه باول كاس والثاني ليه.. يا اسمر لذيت العيش نشرب سويه
مو يگول اسقيني أول كاس واخذ الثاني الك
* اكول.. أنتِ تفتهمين أحسن من السيد؟ هو أبو العلم والشعر والأدب والفقه والمعرفة...
لا تتحارشين بالساده... تره يشوروووون
- ما طول يشوروووون.. ليش ما تسمع حبيهم وتبطل الفرهود انتِ وصاحبك مجلوب
السلف؟

* شوفي جاسمية: السادة يشوروووون.. بس ما يگطعون رزق العالم..
شلون نعيش إذا مو مجلوب السلف يناوشنا المقسوم من وره ظهر الحكومة؟ بعدين أنتِ بهذا
حجيج طيرتي الزحلاوي من راسي ونسيتنا غزال الكرخ وطلايب السيد
ياغزال الكرخ واوجدي عليك / كاد سري فيك أن يُنتهكا.. انا الياويلاه.. ويلاه ...

مشهد رقم (26)

جاسمية وطلابة عشيرة أبو جاسم

- * بيش بلشت يا بو البشت
- اي جا شلون.. حسبالج الدنيا فالتون ... كلمن إله!
- *شوف أكلك أبو جويسم.. أنا لا أعترف بعشيرتك ولا بشيخكم
- خوش.. خلي يجي شيخ عشيرتكم ونتفاهم.. إحنا حسابنا بالمضيف
- * لا مضيف ولا بطيخ.. أنا ما اعترف بهالسوالف.
- إحنا هم ما نعترف بالحكومة ولا بالمحاكم.. إحنا زلم
- * يعني من تمشون على الباطل تصيرون زلم.. ليش ما تعترف بالحكومة يابه؟ مو تاخذ معاشك من عدها
- هي شجم دينار خرده حاسبتة منية حكومة علينا.. لوما مجلوب السلف جان متنا من الجوع!
- * إي تركضون على النهب والفرهود.. مجلوب السلف يبوك وينهب مال الله وعباده.
- شنو شفتيه بايك جامع لو كنيسة؟ هي شويه دولارات مال النفط، وكل الناس تشرب منه، أنا ومجلوب السلف حالنا حال هالوادم.. بين اسبوع والآخر نحصل إلنا تانكي نفظ بالواسطة ونبيعه عالمولدات.. هاي هيه الله وكيلج، محمد كفيلج.
- * والتصريف مال البنك.. اللي يفرهده مجلوب السلف كل يوم جمعه بالمازاد.. ينهب الدولارات سكتاوي.
- جاسمية.. الدولارات مال امريكا... مو مال الخلفوج...خلي ينهبهن ألف عافيه.. إحنا شراح نخسر؟ هم تجينا شجم دولار صفح.. نطلع بيها مصرف ليلة الجمعة.
- * من هذا ما تعترف بالحكومة.. تريدها شغل عشاير.. ثاري المضيف مالكم توزعون بيها المقسوم مال مجلوب السلف.
- اي جا منين مصاريف الشيوخ والمضيف.. قابل من تبرعات ربيع الحفائي.. واحدهم يغني ناصر حكيم بجيبه طوير جاوي.
- * ربعي عايشين بعرق جبينهم.. مو مثل ربعك.. عايشين عاللغف. وين ترحون من غضب الناس، والله لا يخلوكم مثل صديم تطمون نفسكم بنكرة ظلمة.
- ايباه.. ظلي إحلمي بهذا اليوم.. الله لا ينطيج مرادج.. بيش طالبتنه؟ لا حكتنه على هال جم دولار.. شوفيلج جاره وي شيخ العشيرة.. لازم تنطين فصل مال سوالف العوجة.
- * سوالفي عوجه.. ليش بايگه... ناهبه؟
- أكثر.. شتكو لين لربج بالاخرة.. تطلعين عالمودة.. وراسج مفرع.. العشيرة كلها كآبه..
- أني ما اقدر او كفلج بالمضيف.
- * يعني لو ألبس عمامة لو أدفع فصل.. منو يابه يحكم هنا، شيخ عشيرتكم لو الحكومة؟
- مو كتلج إحنا ما نعترف بالحكومة.. إحنا نسمع الشيخ والسيد.. همه يفصلون وإحنا نلبس.. ماكو اعتراض.

* إذا إنتو ما تعترضون.. إحنه نعترض... وباجر ألمّ نسوان السلف ونطلع مظاهرة كدام
المصرفية، لو أكو حكومة وتدافع عن المواطن لو ناخذ الفاس والمكوار وندافع عن نفسنا..
والله نهجم المضيف على أسكم... وان غدا لناظره قريب.
- أنا أخو المصّرّف ... ناظره قريبوووون؟ هاي بس لا طلابه جديده!!

مشهد رقم (27)

جاسمية ومجرشة أبو جاسم

- * أكوّل جاسمية.. شو هالايام ماكو لا حس ولا نفس؟!
- إذا تقصد ماكو مظاهرات ولا اعتصامات.. انتظر.. يومكم قريب
* ليش يومنا؟ احنا بايگين، ناهيين؟ يوم الظالم قريب انشا الله.
- إذا انتو ما بايگين ولا ناهيين.. لعد منو فرهد الخزينة! أبويه لو أمي؟
* أهووو.. عينج على الخزينة، مثل الدجاجة.. تموت وعينها عالزبالة.
- الخزينة، وفلوس النفط.. زبالة، والله يابه منصف.. هاي منو علمك؟ مجلوب السلف؟!
* يعني انت ما عندج عدو غير مجلوب السلف.. الرجال كاعد بالمضيف.. لا يم الخزينة ولا يم الفلوس.
- هسه صار مجلوب السلف ماله شغل بالخزينة.. والدولارات اللي يفرهدهن من البنك ويحولهن للخارج.
* جاسمية.. الدولارات مال الخلفوج؟ مال العم سام.. ناخذهن ونحطهن بالبنك، منها واليه.. قابل احنا بايگيهن.. وداعتج بس تعقلين شويه وتمشين ويانه عدل لا اشتريج قصر باجود رود يم قصر الحبية اليزابيث.
- شلون أمشي وياكم عدل.. يعني أقبل بالعوجه وأكل مال حرام؟!
* انت شمالج فاكه عينج عليه.. انت بس غلسي شويه، لا تفضحينه.. كل شي يكعد بمكانه.
- تاليها أصير مثلكم لا ذمة ولا ضمير.. شاكول للناس؟!
* الناس يا هو مالتها يا جاسمية.. انتي منو سائل عليج.. ما تكليلي منو يعرف فطيم بسوك الغزل! والله لو تبقين تصيحين منا للصبح، ما حد يسمعج ويعرف انت ليش حاركه دمج.
- لا.. الناس مو غشمه.. تعرف زين منو الحرامي ومنو النزيه.. ويومكم قريب.. ما شفت صاحبكم شلون ضم روجه بنكره لما طلعت ريحته وقصوه الربع.
* يعني قصدج احنه منو حتى يومنا قريب.. اشو مجلوب السلف باسبورته بجيبه وما خذه من أبو ناجي.. شوكت مايصير شي يعلك باول طيارة.. والباقي مثله لو للندن لو للمضيف.. اما داعيج فبوجهي أعبّر الحدود مثل الغزال.. ماتشوفيني الا الصبح بالواق واق.
- ما تلحكون.. جان كبلكم أبو صباح لحك على لندن.. والله يعلكوكم من قلاقلكم براس جسر الجمهورية وتصيرون سالفة للرايح وللجاي.
* يابه جاسمية.. حسبالج الوادم مثل كبل.. واحدهم اليوم ماكو براسه غير القيمة والهريسة.. راح ذاك الزمان اللي جان بي الكرخي يطلع مظاهرة ببيت شعر لما يگول:
ساعة وكسر المجرشة وانعل أبو راعيها.
هسه حتى المجرشة صارت حلم.
- ما تصير حلم وإذا ببالك حلم ليلة صيف، فشكسبير ما يفيدكم بعد، لان العاصفة قادمة.

تعريف

مؤيد عبد الستار -- كوت / محافظة واسط 1948

صدر له:

الطريق الى بغداد: ترجمة عن الانجليزية / دار الحكمة لندن
السيرة الذاتية – دراسة في الادب العربي / دار الكنوز الادبية / لبنان
راماينا – ملحمة هندية/ ترجمة عن الانجليزية- دار الكنوز الادبية/ لبنان ودار المنفى/
السويد

امراة من ورق – قصص / دار الحكمة – لندن
الكلام المباح – مقالات في الثقافة والادب والسياسة / السويد
اجراس الرحيل – قصائد / دمشق

تفسير مجموعة قصص صدرت عن المركز الثقافي العراقي في السويد 2014
كورد بكير ترجمة قصة تفسير صدرت في السليمانية عام 2022
نشر مختلف الدراسات والمقالات في الصحف والمجلات وشبكات الانترنت
يقوم في السويد

muayed@gmail.com

كاريكاتير نيويورك

سافرت سائحاً إلى كندا وأمريكا صيف عام 2007. وبينما كنت أتجول في شارع 5th Avenue الشهير في مدينة نيويورك التقيت مجموعة من الحسناوات الايطاليات في ركن من الشارع فأنحشرت بينهن مقامراً ببعض ما في جعبتي من شباب.

رأيتهن يتحلقن حول رسام كاريكاتير يجيد تخطيط وجوههن النظرة بقلمه الممشوق. وما أن فرغ من رسم إحداهن حتى عرض عليّ الجلوس إلى كرسي الفنان الذي رأيتة شبيهاً بكرسي الاعتراف في الكنائس الايطالية.

جلست أمامه فبدأ يخط ويحدق في وجهي وكل ظنه أنني ايطالي من أحفاد بافاروتي أو مايكل انجلو، بعد أن سمعني أطنطن مع الحسناوات ببعض الكلمات التي لقطتها من سفراتي العديدة الى ايطاليا مثل جاو بللينا، اردفيرجي سنيورا، أفانتي سنيوريتا، سالوتي اميكو الخ وما لبثت أن سمع إحداهن تسألني من أين أنت؟ - بغداد.

فصاح الفنان:

- أنت عراقي؟

عرفت أنه رسام الكاريكاتير أسامة عبد الكريم، الذي ينشر رسومه في صحيفة طريق الشعب، وذكّرني بما قرأ لي في مجلة الثقافة الجديدة.

كانت لحظات شيقة أثمرت هذا الكاريكاتير المؤرخ في 24/7/2007.



طلايب جاسمية وأبو جاسم

مشاهد من الأدب الساخر

مؤيد عبد الستار



مكتبة ملهم